

K29
15
:367(4)

K29.
15:367(4)

中國方志叢書·華中地方·第三六七號

據

清·楊昶等修，王繼會等纂
同治九年刊本

影印

四川省

會理州志

(四)

成文出版社有限公司印行

會理州志卷十一

藝文志

文

記

序

銘

賦詩詞

卷之十一

文

藝文志

會野州志卷十一

會理州志卷十一

藝文志上

文

遷修儒學碑記

載舊志

明唐 臯

惟我皇明誕受天命奄有九有稽古右文凡郡邑罔有大小建學設官用敷文教薄海內外咸尊儒術百餘年來治隆俗美上婉唐虞三代之盛而非漢唐宋所可逮者會川古邛都國至漢為越巂郡屬西南爨地在荒徼民彝錯居俗習頑樸勝國以前學校未之

設也迨我國朝統一華夷悉入版圖至折越舊地置
衛控制西番乃建學立師選軍民子弟之後秀者聚
而教之文教卽振譽髦之出類科目之揚聲者不無其
人次之則履貢業監登銓掇職布列庶位不可枚舉
作人之效於是為大歲月滋久學舍侵弊宏治年間
有司嘗亦新之迄今餘三紀官廢於缺銓道衰於寡
師以致學之殿廉堂齋類非往昔之舊矣仰惟皇上
升潛統紹百度維新崇學育材尤切加意有司承德
向風靡間遐邇惟時姚江湖君汝登擢行司抵會川瞻

視文廟大有弗稱况地墊溢淖溼惻然謂茲絃歌俎豆
之地生徒之所藏修民人之所觀化政經理本首務
莫先而顧若此非闕典歟乃相度學之左距三舍地
有神祠高明爽塏堪以遷移簡委經始肇工於嘉靖
甲申踰年落成若殿廉若堂齋棲士之舍若貯器之
庫及庖溜之所規制咸備而又侖負有加視舊學倍
於三之一蓋至是而煥然一新矣衛之長貳謀諸鄉
大夫曰惟茲學宮之遷一方壯觀匪我監司公之作
興烏能有此宜記其事用垂不朽僉唯唯乃悉事之

始末付歲進士高翀不遠數千里持予同年黃職芳
書束請記夫士之養於學校猶材木養於山林也求
材木者必之山林以山林材木所萃也養士而不於
學校假館借師苟簡文具而俾教化不行譬則木之
所生蓄諸盆徒供清玩耳何能望其拱把而合抱拔
一原地而摩青天可以柱明堂而棟大廈以充匠氏之
用也哉胡君司風化之柄於蜀而急急以是為首務
其用志亦勤矣會川之士其容不惕然有動於中乎
游歌其地宜有感觸之機探索其本思為培植之計

必也非詩書禮樂春秋義文孔孟之書不習非仁義
禮智孝弟忠信之道不由非濂洛關閩周程張朱之
說不崇修辭以立誠為本檢身以務實為要居官以
舉職為能用智以集眾為長庶乎處則志行修篤出
則德業光明有以揚休簡冊增重家邦為時名士於
我祖宗列聖興學作養之至意與監司今日遷修之
盛舉良不負矣是為記

李指揮孝思詩序

明新都縣人 楊廷和

予友雲南按察使王君行之寓書於予亟稱會川衛

指揮李君秉昭之賢比以閱試來京因鄉進士劉朝
重造予予一見異之信行之之言不失也朝重複為
予言秉昭之為人事親能養三年之喪動必以禮比
葬廬於墓側朝出治官事暮歸宿於其所御下嚴而
有恩政成無賄蠻夷悅服嘗值歲旱禱雨輒應合穎
之禾連穗之麥屢於其封內見之部使者數旌其能
或問之則曰此非燧之能先人教之也燧遵遺訓猶恐
無似以忝世德於是聞者益賢之其歸也朝紳諸大
夫皆賦詩贈之題曰思貽蓋有取於記禮者之言亦

秉昭之意也夫記之所謂思貽者有二曰將為善思
貽父母令名必果又曰將為不善思貽父母羞辱未
果二者皆是也出乎彼則入乎此秉昭所以貽其親
者可謂有令名而無恥辱矣夫名非君子之所尚也
君子為名譽而為善則其為善必不誠秉昭思貽其
親以令名則是非以自為也為其親也是豈非誠於
為善者哉天下之善一也以之事親則孝以之事君
則忠以之治民則為良有司而治軍旅則為良將皆
是物也蜀自近年以來邊圉多警盡一省之財力屑

曾子少云
越於區區股掌之地而戰不足以爲威守不足以爲固是皆將領之責也於是乎有吏議焉有軍刑焉蓋亦羞其先人負其世澤多矣使皆有秉昭之恩貶之心則其憤事豈至是哉秉昭行且有將領之責者也故因詩之序而有是說焉語曰惟善人能受善言秉昭其必有以受此矣

胡公生祠碑記

進士 明 劉 璣 朝重

嘉靖乙未越舊吉侯與耆老謁余請曰昔我兵憲胡公遺愛行司五衛猶召伯甘棠於南國雖建生祠崇

祀年遠未有以記非缺典歟敢乞碑文用垂不朽余
曰胡公之生不偶其祠之建豈偶然哉公名東皋字
汝登號方崗浙之姚江人宏治己丑予同登進士繇
尚書郎出守甯國尋陞憲副專勅行司下車巡行邊
徼丕振風聲興利除害激濁揚清百度惟貞庶政畢
舉考其實績梗槩如越舊衛先僅土城每遇雨圯公
為長久計簡委率治磚石五閱月而雉堞落成鎮西
守禦亦成堅壁如土番咱烏及附近夷賊剽掠為患
我公奮揚威武掃穴黎羗孔道疏通時已褫破酋奴

之膽公乘勝整旅誅建昌跳梁之阿女悟鮮甯番之
瓦都阿尾又殲會川之安大義阿迷賊勢漸潰豺狼
歛跡凡公運籌間而五衛蒼赤俱伏奠安且如越舊
災旱公捐金賑濟全活者甚衆他若改大渡河之路
以避流沙之險易相嶺之危而變通往來之逕成徒
輿之杠梁而人不病涉疏通鹽法而利澤遍源均派
丁糧而暴斂頓革清屯田汰冗食充倉廩其間調停
漢夷櫛風沐雨或勦以奪其魄或撫以服其心將邊
土一塊保若金甌鞏固自此妖魔之徒罔敢窺覷則

治安已在萬年公猶偃武修文另卜會川黌序之址
加意修葺陶冶羣生文教之振興端由此始丙戌秋
公以內艱訃至軍民驚訝曰邊城半壁誰與撐持無
奈公不俟駕父老兒童伏道攀轅不可得止泣涕而
歸爰建生祠於越塑公像與霄壤共為頂赫公服闋
補威茂陞本省臬臺軍民猶沾化雨無何巡撫甘肅
籌邊弭寇聖主無西顧之憂轉鄖陽不踰年遂召入
內臺風采凝峻表儀朝著霖雨天下蒼生洵知公之
生非偶然矣敬採口碑以鐫之不朽

友愛堂記

楊廉方震

嚴君吾江藩理官也嘗謂余曰泰之先浙水仁和人
五世祖從戎會川衛因家焉會川接滇池鄰吐番為
西蜀極邊地泰以遠方下士得觀上國之光而江右
又四方所推文獻者茲幸遊宦焉意者文章翰墨亦
欲憑藉收拾以為衣被藻飾之具於以傳家而珍嚴
焉不識可乎予曰何謂也君曰念其先考之為兄弟
者三伯諱俊仲諱傑季諱仲鼎立克家而仲尤亢宗
則先考也居常朝夕聚處相與談論不倦怡怡終日

絕無間言伯卒遺孤甫歲餘先考撫育長成過於已
子田廬便利者悉以付之初無難色先考見背秦年
始十七弟和及二女弟皆幼稚撫長成則惟母氏是
賴秦承先考遺言治舉子業而母氏復資遣入郡庠
補弟子員至有今日若於和而娶焉而析產焉於二
女弟之于歸焉則亦不敢不仰遵先考之所以處孤
姪者而處之也卿大夫李君嘗贈以友愛堂三字實
以先世之故而勉秦等以似述之此愛人以德之意
也詎可忘之既以揭之堂楣而縉紳士復歌之咏之

矣顧斯堂獨未有為之記者竊願徼惠於執事予曰
夫友愛自性中來也性自天命中來也與生俱生者
也性雖有仁義禮智之名然一發則四者與俱仁中
未嘗無義禮智義中未嘗無智禮仁禮智亦然但就
其所發之所重者而言則曰仁曰義曰禮智耳程子
謂於一理中分別出是也若友愛者自有子孝弟為
仁之說則屬仁自孟子從兄之說則屬義在有子則
專言之在孟子則偏言之專言則包括愈盡偏言則
界限愈明是皆吾性之所固有推之同氣而為友愛